

Cadeirydd y Pwyllgor Cyfrifon Cyhoeddus  
Cynulliad Cenedlaethol Cymru  
Tŷ Hywel  
Bae Caerdydd  
CF99 1NA

28 Ionawr 2020

Annwyl Gadeirydd


## Adroddiad y Pwyllgor Cyfrifon Cyhoeddus ar Graffu ar Gyfrifon 2018-19

Rwy'n ysgrifennu mewn ymateb i adroddiad y Pwyllgor Cyfrifon Cyhoeddus ar Graffu ar Gyfrifon 2018-19. Hoffwn ddiolch i'r Pwyllgor am ei waith craffu. Byddwn yn parhau i ddatblygu ein dull o gynnwys gwybodaeth hygyrch a thryloyw yn ein dogfen Adroddiad Blynyddol a Chyfrifon.

Hefyd, hoffwn achub ar y cyfle hwn i sicrhau'r Pwyllgor ein bod yn parhau i fod mor ymrwymedig ag erioed i ddarparu sicrwydd drwy waith craffu ac archwilio allanol, yn ogystal â'n fframwaith llywodraethu mewnol. Mae'r gwaith hwn yn hanfodol wrth ategu ein hyder ein bod yn defnyddio adnoddau'n effeithlon, yn ddarbodus ac yn effeithiol wrth ddarparu ein gwasanaethau i'r Cynulliad.

Rhoddir sylw llawn i argymhellion eich Pwyllgor ynghylch y Comisiwn yn yr Atodiad sydd ynghlwm. Os hoffech gael rhagor o wybodaeth am unrhyw fater yn yr atodiad, mae croeso i chi roi gwybod i mi

Yn gywir



Suzy Davies

copi at Gomisiynwyr y Cynulliad, Manon Antoniazzi, Nia Morgan



# Adroddiad y Pwyllgor Cyfrifon Cyhoeddus ar Graffu ar Gyfrifon 2018-19

## **Argymhelliad 1. Mae'r Pwyllgor yn argymhell bod Comisiwn y Cynulliad yn cyflwyno dangosydd perfformiad allweddol sy'n canolbwyntio ar reoli ariannol yn hytrach na tharged alldro.**

Ni dderbyniwyd yr argymhelliad.

Mae'r Comisiwn o'r farn bod cyflwyno dangosydd perfformiad sy'n gofyn am gyfrifon diamod yn darparu mesur awdurdodol o drefniadau rheoli ariannol, lle mae hysbysiad gan Archwilydd Cyffredinol Cymru yn achredu'r Comisiwn yn glir ynghylch ei brosesau a'i reolaeth ar gyllideb y Cynulliad.

Mae'r dangosyddion newydd yn rhoi sicrwydd bod cyfrifon gwir a theg yn cael eu cynhyrchu yn amserol, yn unol â'r gyllideb a gafodd ei nodi ac a fu'n destun gwaith craffu gan y Pwyllgor Cyllid.

Mae'r dangosydd newydd ar alldro (sy'n sicrhau tanwariant gweithredol heb fod yn fwy na 1.5 y cant) yn dileu'r targed blaenorol (<0.5 y cant), a allai fod wedi ysgogi ymdrechion i wario'r holl arian sydd ar gael, gan gynyddu'r risg o orwario hefyd. Mae hefyd yn cynnal ac yn annog y broses o ddychwelyd unrhyw danwariant mewn achosion lle ceir oedi neu lle nad oes unrhyw gynlluniau gwariant cadarn. Mae'r Comisiwn a Phwyllgor Archwilio a Sicrwydd Risg y Cynulliad (ACARAC) yn ystyried bod y dangosydd hwn yn un pragmatig ac adeiladol.

Bydd Comisiwn y Cynulliad yn adolygu'r dangosyddion perfformiad corfforaethol hyn ar ddiwedd y cyfnod adrodd cyntaf, ac yn ystyried a oes angen unrhyw newidiadau.

## **Argymhelliad 2. Mae'r Pwyllgor yn argymhell bod Comisiwn y Cynulliad yn cynnwys y ffigurau ar gyfer y tair blynedd diwethaf o ran y bwlch cyflog BAME yn yr adroddiad amrywiaeth a chynhwysiant er mwyn caniatáu ar gyfer gwneud cymhariaeth o ran y cynnydd a wnaed yn y maes hwn**

Derbyniwyd yr argymhelliad.

Bydd Comisiwn y Cynulliad yn cynnwys gwybodaeth gymharol ar ei fwllch cyflog BAME, pan fydd ar gael, yn ei adroddiad amrywiaeth a chynhwysiant ar gyfer 2020. Yn yr adroddiad nesaf, bydd y wybodaeth hon yn cynrychioli dwy flynedd o ffigurau; yn y blynyddoedd i ddod, bydd yn cynrychioli tair blynedd o ffigurau.



**Argymhelliad 3.** Mae'r Pwyllgor yn argymhell bod Comisiwn y Cynulliad yn darparu tystiolaeth i dawelu meddwl y Pwyllgor nad yw'r polisiâu recriwtio yn cyfyngu ar nifer gyffredinol yr ymgeiswyr ac yn arbennig y rhai o gefndiroedd BAME a phobl o grwpiau economaidd-gymdeithasol is, a hynny fel bod y dystiolaeth hon yn cyfrannu at waith craffu'r Pwyllgor o'r Adroddiad Blynyddol a'r Cyfrifon yn ystod tymor yr hydref nesaf.

Derbyniwyd yr argymhelliad.

Mae Comisiwn y Cynulliad wedi ymrwymo i wella ei ymgysylltiad â phobl o gymunedau Du, Asiaidd a Lleafrifoedd Ethnig, a hynny drwy ei waith allgymorth a thrwy barhau i nodi'r holl gyfleoedd i gynyddu cynrychiolaeth yng ngweithlu'r Comisiwn. Mae'r Comisiwn wedi cytuno ar ddangosydd ymestyn newydd ar gyfer cynrychiolaeth BAME yn y gweithlu, ac wedi ymgysylltu â Busnes yn y Gymuned Cymru i gefnogi ein gweithgareddau.

**Argymhelliad 4.** Mae'r Pwyllgor yn argymhell bod Comisiwn y Cynulliad yn ystyried gosod targed mwy penodol o ran canran ar gyfer y mynegai ymgysylltu a hynny yn sgil y ffaith ei fod yn gyson rhagori ar y targed fel y'i gosodwyd ar hyn o bryd.

Ni dderbyniwyd yr argymhelliad.

Mae'r sgôr ymgysylltu yn gyfuniad o bum cwestiwn craidd, ac mae'n darparu meincnod sy'n ddangosydd ar draws sefydliadau tebyg. Rydym yn ofalus i beidio ag adolygu'r sgôr ar ei ben ei hun, ac rydym yn ystyried dangosyddion eraill mewn perthynas â'r gweithlu i roi darlun ehangach o iechyd sefydliadol. Rydym yn fodlon bod y cymharydd yn feincnod priodol, ac mae ein perfformiad da parhaus yn y maes hwn yn caniatáu inni ganolbwyntio ar feysydd eraill o weithgarwch y mae angen mwy o gefnogaeth arnynt, o bosibl.

**Argymhelliad 5.** Mae'r Pwyllgor yn argymhell bod Comisiwn y Cynulliad yn cyhoeddi canlyniadau cyffredinol pob cwestiwn unigol yn yr arolwg staff. Dylai hyn gynnwys data cymharol dros gyfnod o dair blynedd.

Derbyniwyd, yn amodol ar ymgynghoriad.

Bydd Comisiwn y Cynulliad yn ymgynghori â staff. Yn dilyn yr ymgynghoriad hwnnw, bydd yn ystyried cyhoeddi canlyniadau cyffredinol arolygon staff yn y dyfodol.

**Argymhelliad 6.** Mae'r Pwyllgor yn argymhell bod Comisiwn y Cynulliad yn ailedrych ar y targedau ar gyfer ymgysylltu â dinasyddion er mwyn sicrhau bod modd eu cyflawni, eu cofnodi, eu bod yn ceisio cyrraedd croestoriad mor eang â phosib o'r boblogaeth ac y byddant yn ychwanegu gwerth.

Derbyniwyd yr argymhelliad.



Yn ddiweddar, penododd y Comisiwn Gyfarwyddwr Cyfathrebu ac Ymgysylltu newydd, ac mae strategaeth newydd wrthi'n cael ei datblygu. Fel rhan o'r broses hon, bydd y Comisiwn yn ailedrych ar dargedau ac yn rhoi ystyriaeth i farn y Pwyllgor.

**Argymhelliad 7. Mae'r Pwyllgor yn argymhell bod Comisiwn y Cynulliad yn ailedrych ar ei darged ar gyfer caffael er mwyn sicrhau, wrth gydbwysu ystyriaethau gwerth am arian, ei fod yn ysgogi cynnydd yng nghyfran y gwariant gyda busnesau bach yng Nghymru, gan gynnwys y rhai sy'n ymwneud â'r gadwyn gyflenwi**

Derbyniwyd yr argymhelliad.

Bydd Comisiwn y Cynulliad yn adolygu'r dangosyddion perfformiad corfforaethol ar ddiwedd y cyfnod adrodd cyntaf. Gan nodi argymhelliad y Pwyllgor, bydd yn ystyried a oes angen ailedrych ar y targed ar gyfer caffael, o gofio mai prif bwrpas y targed ar hyn o bryd yw cynyddu canran y gwariant gyda chyflenwyr o Gymru.

**Argymhelliad 8. Mae'r Pwyllgor yn argymhell bod Comisiwn y Cynulliad yn pennu ystod o ddangosyddion i gyflawni'r nodau uchelgeisiol sydd eu hangen i wella cynaliadwyedd yn barhaus a lleihau effaith Comisiwn y Cynulliad ar yr amgylchedd.**

Derbyniwyd yr argymhelliad.

Ar hyn o bryd mae Comisiwn y Cynulliad yn y broses o bennu ystod newydd o dargedau uchelgeisiol. Bydd y targedau hyn yn cael eu trafod gan y Comisiwn yn ei gyfarfod ym mis Mawrth.

